

AVP a acepta 30 dia di OLA

ORANJESTAD(AAN) Politica na Aruba ta dal bueltanan den tur direccion pasobra apenas Henny a pone ultimatum ayera mainta pa 10'or, cu prome cu esaki a yega su limite ya caba AVP a acepta e periodo di 30 dia cu OLA a duna AVP pa regla cuenta.

E problema cu a surgi entre AVP y OLA pa cu e asunto di comisario na aeropuerto, lo bay worde discuti den un periodo di 30 dia pa asina AVP y OLA saca nan som si nan ta bay sigui goberna cu otro si o no.

Formacion di gobierno tabata un rekmento di tempo sin fin caba entre AVP y OLA te ora cu por a yega asina leu pa forma gobierno y ora cu gobierno mester a sinta a surgi e problema di huramentacion, pa despues bin e problema di ley di choller pa awor e problema di comisario sigui den e racha di wega politico den coalicion.

OLA kier core cu tur comisario cu ta di AVP den proyectonan cu ta cay bao di ministerio di OLA y AVP ta haya cu nan como partido grandi mester keda representa den proyectonan cu ta cay bao di gobierno pasobra AVP ta e partido mas grandi.

Lider di OLA a duna di conoce cu OLA lo re introduci Joe Maduro como comisario di aeropuerto, pero despues di 30 dia mester yega na un solucion sino fono no lo bay tin gobierno mas!

Di parti di AVP e mesun señal a worde manda pa pueblo pa asina e circulo di

wega di ping pong por a worde completa pasobra den e powerplay cu tin entre AVP y OLA ningun hende por baha cabez pa otro.

Ayera DIARIO a bolbe haya reaccion di parti di palancanan di OLA cu tabata puntra nan mes ta di con Henny ta bringa tanto asina pa e comisario cu lo ta afilia cu AVP, si e comisario aki ta keda como consehero legal di aeropuerto?

Bo no por ta comisario y na mesun momento bo ta abogado tambe cu ta trata casonan di aeropuerto pasobra esaki no ta forma un conflicto di interes?

Pueblo na su turno tabata puntra ayera pa gobierno publica cuanto cada comisario den proyecto di Aeropuerto ta gana pasobra si e abogado tabata haya 1.6 milyon pa aña anto ta cuanto e otro comisaronan ta haya pa luna?

Tambe e asunto di cada biaha core tene conferencia di prensa pa anuncia cu gobierno ta den cay, tin pueblo harta y pueblo ta haya cu e asunto di 30 dia ta otro wega



politico cu atrobe ta worde hunga cu pueblo y pueblo kier tende e siman aki mes si AVP

y OLA ta sigui cu otro.

Pakico mester di 30 dia pa algo cu ya tur hende sa, esta

cu cos no ta bon entre AVP y OLA y cu e coalicion aki a cuminsa riba un mal pia cu ta precedente di e periodo di postema cu a rebenta y te awe tin su manchanan moli moli riba e coalicion nobo.

Ta ridiculo y un falta di respet pa bolbe wanta pueblo 30 dia den incertidumbre pa wak si lo bay tin gobierno aki 30 dia si o no.

E menaza di cada biaha benta gobierno abao y laga miembronan di prensa manera macaco core subi auto pa bay atende conferencia di prensa di AVP y OLA cu ta bolbe anuncia cu gobierno ta den basha abao, pa despues den menos cu 1 ora pueblo bolbe tende cu cos a drecha, tin hende cansa.

E mihor cos cu gobierno por haci ta anuncia na pueblo ora cu e gobierno a cay di berdad y cu tin eleccion na caminda y no cu cada biaha ta dal otro cu palo pa despues pueblo bin tende cu nan ta vrij cu otro atrobe; esaki aparentemente lo ta e forma con hendenan drechi ta goberna cu otro a base di raport calidad cu tur respet?